



宛陵先生詩集序



予聞世謂詩人少達而多窮夫
豈然哉蓋世所傳詩者多出於
古窮人之辭也凡士之蘊其所
有而不得施於世者多喜自放
於山巔水涯外見蟲魚草木風
雲鳥獸之狀類徃徃探其竒怪

內有憂思感憤之鬱積其興於
怨刺以道羈臣寡婦之所歎而
寫人情之難言盖愈窮則愈工
然則非詩之能窮人殆窮者而
後工也予友梅聖俞少以蔭補
為吏累舉進士抑於有司困於
州縣凡十餘年年今五十猶從

辟書為人之佐鬱其所畜不得
奮見於事業其家宛陵幼習於
詩自為童子出語已驚其長老
既長學乎六經仁義之說其為
文章簡古純粹不求苟說於世
世之人徒知其詩而已然時無
賢愚語詩者必求之聖俞聖俞

亦自以其不得志者樂於詩而發之故其平生所作於詩尤多世既知之矣而未有薦於上者昔王文康公嘗見而歎曰二百年無此作矣雖知之深亦不果薦也若使其幸得用於朝廷作為雅頌以詠謔大宋之功德薦

之清廟而追商周魯頌之作者豈不偉歟柰何使其老不得志而為窮者之詩迺徒發於蟲魚物類羈愁感歎之言世徒喜其工不知其窮之久而將老也可不惜哉聖俞詩既多不自收拾其妻之兄子謝景初懼其多而

易失也取其自洛陽至于吳興
以來所作次為六十卷予嘗嗜
聖俞詩而患不能盡得之遽喜
謝氏之能次也輒序而藏之慶
曆六年三月右正言知制誥知
滁州事歐陽脩序

宛陵先生文集目錄卷第一

西京詩

和謝希深會聖宮

右丞李公自洛移鎮河陽

上巳日午橋石瀨中得雙鰕魚

寒食前一日陪希深遠遊大字院

遊龍門自潛溪過寶應精舍

依韻和希深遊大字院

白傳舊宅

傷白雞

尹師魯治第伐樗

尹陽尉耿傳惠新栗

和楊子聰會董尉家



嶺雲

垂澗藤

林翠

舟中遇雪

田家 四時

涂中遇雪寄希深

妾薄命

秋日同希深席上作

和希深雨後見過

和子聰夜雨

和趙貞外趙韓王故宅

春日遊龍門山寺

和希深遊府學

傷祭

觀理稼

新蘭

和希深遊樂園

錦竹

廢井

茶竈

緱山子晉祠

少林寺

少姨廟

天封觀

會善寺

啓母石

輾轅道

中伏日避暑

元政上人遊終南

寄河陽富彥國

河南受代希深示詩

秋雨

白雲和子聰

同友訪郭生別墅

水莊

黃河

王氏昆仲歸寧

荅子聰惠書

環州通判張殿丞

張太素之邠幕

孫屯田召為御史

與文納涼分題

梅花

和希深立春

尹子漸歸華

初見杏花


目錄終

宛陵先生文集卷第一

和謝希深會聖宮

三后威靈遠層巒棟宇興衣冠漢原廟歌舞魏西
 陵日月融光盛山河王氣增叢楹琢文石連網絡
 朱繩碧瓦寒鋪玉重欄瑩鏤冰粹儀神霧擁法袞
 繡龍升星斗羅容衛軒墀侍股肱宸蹤耀璇榜瑞
 羽集觚稜闕殿深珠箔雕垣界綺縠笙從緱嶺咽
 雲傍帝鄉凝龜組恭來詣貂璫肅奉承欲知歸厚
 意孝德自烝烝

右丞李相公自洛移鎮河陽



侯服齊三輔天臺聳百僚新章刻銅虎舊德冠金
貂已作歌襦化方期執玉朝雙鞬辭洛宅千騎向
河橋鼓角春城暮鶯花故苑遙瓜亭猶接畛棠茇
自敷條夾道都人擁迎風駟牡驕莫隨文學乘空
望旆旌飄

上巳日午橋石瀨中得雙鰕魚

脩楔洛之濱湍流得素鱗多慙折腰吏來作食魚
人水髮粘篙綠溪毛映渚春風沙暫時遠紫線憶
江蓴

寒食前一日陪希深遠遊大字院

一百五將近千門煙火微閑過少傅宅喜見老萊
衣晚雨竹間霽春禽花上飛禪庭清溜滿幽興自
忘歸

遊龍門自潛溪過寶應精舍

遙愛夏景佳行行清興屬安知轉迴溪始覺來平
谷古殿藏竹間香庵遍巖曲雲霞弄霽暉草樹含
新綠時鳥自綿蠻山花競紛縹莫言歸路賒明月
還相續

依韻和希深遊大字院

白傅舊宅

夫君康樂裔顧我子真派湛然懷清機超爾尋虛

界暫來香園中共憇寒松大先生醉復吟長老言
不壞信與賞心符寧同俗士愛杖屨恣遊遨池塘
仍感槩焚香露蓮泣聞磬霜鷗邁青板今已空濁
醪誰許載軟草當熊網低篁挂纓帶不覺月明歸
候門僮僕怪

傷白雞

我庭有素雞翎羽白如脂日所慮狂犬未嘗憂孽
貍瞑棲向簷隙朝啄循階基每先烏鳥鳴不失風
雨時雖吾困廩薄尚汝稻糧遺昨宵天氣黑陰物
恣所窺潛來啣搏去但覺聲音悲開門俾馳救已

過墻東陸呵叱不敢食奪然留在茲湧血被其頸
喙呷氣甚危皓臆鱗鱗打赤霜翅兩離披憫心欲之
活碎腦安能治委瘞從爾命孰忍薑桂為猶看零
落毛蕩漾隨風吹念始託茲地蒙幸信可知充庖
豈云患度日無若飢如何遇兇獸毒汝曾不疑斯
事義雖小得以深理推鄧生賜山鑄未免終餒而
人道尚乃爾愴焉俛眉

尹師魯治築伐樗

伊人利營構思欲新其居匠築經舊址簷楹礙高
樗且云忍不伐何以成吾廬人言此樹古百怪所

憑依獨秉一定議自將羣俗違乃俾執柯者丁丁
霜刃揮殲殞條百尺橫仆株數圍從茲朝夕間不
聞鳥雀喧既能考子室而復高其門周也昔騁辯
得以不材論工今誠匪度苟害安可存舟楫且非
藉薪爨聊用燔莫比溝中斷區區望犧樽

尹陽尉耿傳惠新栗

金行氣已勁霜實繁林梢尺素走下隸一奩來遠
郊中黃比玉質外刺同芡苞野人寒齋會山爐夜
火炮梨慚小兒嗜茗憶簾官拋此焉真可貺遽爾
及衡茅

和楊子聰會董尉家

董生方好雅茲日為掃扉森爾延嘉賓歡然去塵
機有客振雙袂敢言陽春暉聊停玉麈尾為歌金
縷衣古辭何稠疊無乃惜芳菲三閭不鋪糟二子
自採薇雖留千載清未免當時飢吾愛曹公詩古
來不敢非人生若朝露捨醉當何歸四座驚此語
未獸翠觴飛胡能後天地何可惜輕肥沉酣且長
詠白首空歔歎

嶺雲

片雨過青天山雲歸絕嶺林際隱微虹溪中落行

影還看隴首飛復愛山間靜

垂澗藤

寒松偃澗濱弱蔓垂纓綠波縈翠帶長水濺低花
馥終日採蘋人攀條映巖曲

林翠

淺鬱鬱長條抽林間翠堪翦背嶺山氣濃幽人趣不

舟中遇雪

曉風鳴大澤春雪下長河沙草緣堤沒楊花拂水
多驚鷗不知遠候鴈幾聞過欲問耶溪轉今朝奈

興何

田家 四時

昨夜春雷作荷鋤理南陂杏花將及候農事不可
遲蠶女亦自念牧童仍我隨田中逢老父荷杖獨
熙熙

草木遶籬盛田園向郭斜去鋤南山豆歸灌東園
瓜白水照茅屋清風生稻花前陂日已晚聒聒競
鳴蛙

荒村人自樂頗足平生心朝飯露葵熟夜春雲谷
深採山持野斧射鳥入煙林誰見秋成事愁蟬復

然礎

今朝田事畢野老立門前拊頸望飛鳥負暄話餘
年自從備丁壯及此常苦煎卒歲豈堪念鷦衣著
更穿

涂中遇雪寄希深

方爲郡邑吏日與故人違極目千山碧馳心一鳥
飛岸傍村杳杳波上雪霏霏欲寄洛陽信泝流行
客稀

妾薄命

昔是波底沙今爲陌上塵曾聞清泠混金屑誰謂

飄揚逐路人悠悠萬物難自保朝看穠華暮衰老
須知鈿黛不足論何必芳心競春草草有再三榮
顏無一定好曩恩寧重持徒能亂懷抱

秋日同希深昆仲遊龍門香山晚泛伊川

觴詠久之席上各賦古詩以極一時之娛

落日川上好徘徊弄孤舟鳴榔進山口清唱發渡
頭淺瀨不可泝停橈信中流山樽對蒼翠溪鳥自
沉浮濯足破嵐影身菱臨芳洲千龕晚煙寂雙壁
紅樹秋細細石間泉搖搖波際樓澄潭若瀉鑑萬
象已盈眸康樂足清尚惠連仍此遊摘景固無遺

揮筆曾未休醉來同淵明興盡殊子猷歸傍漁梁
靜行看夜火幽露華初滴滴夜吹何颼颼不犯巖
城漏誰言憐近立

依韻和希深雨後見過小池

碧池新雨後清興一何賒有客過顏巷無貧似阮
家白醪聊泛蟻黃菊未開花既至休辭醉君其奈
歲華

依韻和子聰夜雨

窻燈光更迥宿霧晦層簷寒氣微生席輕風欲度
簾濕螢依草沒暗溜想池添況值相如渴無嫌魯

酒甜

和趙負外良佐趙韓王故宅

開國勲庸大重城邸第寬枯楊映樓角蔓草被墻
端不見分香妾空餘鬪鴨闌誰來悲孔雀金翠羽
毛殘

春日遊龍門山寺

還邀二三子共到鑿龍遊陰壑泉初動春巖氣欲
浮竹藏深崦寺人渡晚川舟始覺山風急歸鞍不
自留

依韻和希深遊府學

東府尊儒日中州進學初
牲牢奠商後典籍講秦
餘大法存無外群英樂
自如時慙遊聖末來駕
折轅車

傷桑

柔條初變綠春野忽飛霜
田婦搔蓬首水蠶絕繭
腸名翬依麥雉戴勝繞
枝翔不見羅敷騎金鈎
自挂牆

觀理稼

稂莠日已長忽忽芟薙
初來時露沾屨歸去月
侵鋤一腹餒猶甚百骸
勤有餘吾無力畊苦謬
讀古

人書

新繭

露柘林初靜煙梯不復收
春蠶吐絲足工女忌寒
休翠薄時方獻清泉緒未
抽閨中能自巧繡作玉
釵頭

依韻和希深遊樂園懷主人登封令

竹映紅蕖水榭開門閑乳
雀下青苔伊人何戀五
斗粟不作淵明歸去來

錦竹 此草也似竹而斑

雖作湘竹紋還非楚筠質
化龍徒有期待鳳曾無

實本與凡草俱偶親君子室

廢井

陲廢不知年石欄苔蘚澁渴心空自煩長綆曾誰
汲無復語滄波坎蛙奚所及

茶竈

山寺碧溪頭幽人綠巖畔夜火竹聲乾春甌茗花
亂茲無雅趣兼薪桂煩燃爨

緱山子晉祠

以下陪太尉錢相公遊嵩山七章

王子居玉京故山空寂寞猶聞遡月笙尚想賓天
鶴翠栢深古壇丹霞留迥壑芝庭誰欸扉旌旗穿

林薄

少林寺

紅旌過翠岑林際瞻蓮宇門對幾千巖花開第一
祖禪庭松色寒石室苔痕古寂寂不逢人空簷鷲
方乳

少姨廟

靈祠古殿深少室群峯碧行雨欲隨車望巖非化
石常聞蘭氣蒸誰奠椒香液寄謝洛川妃凌波定
何益

天封觀

車馬雲外來衣露半山雨珥節扣真居捫蘿笑塵
矩迴溪響石叢靈茹抽巖塢玉檻刻年華應無愧
前古殿檻石柱上有唐樊宗師石鴻韓退之盧全題名在焉亦刻名於此

會善寺

杳謁隨龍節縈紆歷寶山瑠璃開淨界薜荔啓禪
關煮茗石泉上清吟雲壑間峯端生片雨稍促晝
輪還

啓母石

曠哉嵩室陽神怪所棲宅蒼石不知年靈熊去無
迹煙巖想桂宮苔壁疑椒掖不學舜娥悲瀟湘竹

枝碧

輾轆道

險絕稱漢關晨躋瞻一室盤紆石路回迤邐雲峯
出古壁挂青蒼天風起蕭颼洛城西首時望望平
煙密

中伏日陪二通判妙覺寺避暑

時有僧鼓琴於座上

紺宇迎涼日方床御綌衣清談停玉麈雅曲弄金
徽高樹秋聲早長廊暑氣微不須河朔飲煮茗自
忘歸

元政上人遊終南

雉節居杜陵南山常在目今茲羨行遊因以謝崑
谷環錫恣探勝樓碁方踐陸五門嵐翠橫人水秋
陰覆雲峯多隱見林嶺乍回復若見採芝人余非
戀微祿

寄河陽簽判富彥國

籍籍名方遠人知第一流翻同貴公子來事外諸
侯地險長河急天高畫角秋仲宣應自樂寧復賦
登樓

河南受代前一日希深示詩

我昔在桐鄉伊人頗欣戴今來佐洛南事事為時

背自愧居下流無能謝前輩固乏橫草功當蒙及
瓜代且遺牒許還何用吏民愛洗眼看舊書怡然
忘字內

秋雨

雨後秋氣早涼歸室廬清旣推蚊蠅勢任壯蛩蟬
聲石榴墜枝熟蒼蘚綠堦生閉門且高卧畏向泥
涂行

白雲和子聰

長憶江海間龍鳴向寒水藹藹蒼渚空悠悠白雲
起是時在漁舟放溜看未已今來居洛陽埃壒生

蹄軌羨君茲日心
怙悵聊徙倚

同尹子漸王幾道訪郭三別墅不遇

秋野已澄曠偶來幽興多
茨居隔寒水柴戶蔭喬
柯看竹曾留鳳携朋不爲
鵝人歸碧苔徑應識履
痕過

水荇

灼灼有芳艷本生江漢濱
臨風輕笑久隔浦淡粧
新白鷺煙中客紅蕖水上
隣無香結珠穗秋露浥
羅巾

黃河

積石導淵源汙汙瀉崑閩
龍門自吞險鯨海終涵
量怒湫生萬渦驚流非一
狀淺深殊可測激射無
時壯常苦事隄防何曾息
波浪川氣迷遠山沙痕
落秋漲槎沫夜浮光舟人
朝發唱洪梁畫鷁連古
戍蒼崖向浴鳥不知清夕
陽空在望誰當大雪天
走馬堅冰上

王氏昆仲歸寧

昨夜雪霏霏梁山吟未歸
關河誰道遠鴻鴈自相
依落日人煙少寒雲驛路
微共將彭澤酒稱壽向
庭闈

子聰惠書備言行路及遊王屋物趣因以荅

自我河橋來清話殊未已亟言閱通疇晨駕遂遵
彼尺書忽見遺經由皆可紀草草始辭家忽忽渡
河水前村客心速入暮陰風起脩路隘且長疲驂
未能止茅居聒夜春寒犬吠墟里明發西北行崗
巒踰迤邐叢藁但蒙密未見山中美谷開逢邑問
豈謂連都鄙冠帶一二同磨麋左右比問子奚所
之俛眉聊啓齒瞥往登天壇煙雲隨步趾傍臨日
觀低却望嵩丘邇屑屑視塵埃紛紛若螻蟻便有
林壑心期將榮宦委我昔愛青蒼無時常徙倚今

朝羨君游勝事空聳企徒嗟黃綬身莫接青霞軌
安得憑羽翰幽懷寄如此

環州通判張殿丞

九

欲向蕭關外窮陰雪暗沙磧寒鴻鴈少冰合水泉
賒自有從軍樂應無去國嗟春風曾不到吹角寄
梅花

張太素之邠幕

應幙向幽郊晨裝辭邠鄆長亭欲少留飛鵠初成
曲魯酒上離顏行塵生驥足悠悠關戍遙黯黯煙
雲屬塞邑多苦寒國風遺舊俗寄音文讌餘莫待

霜條綠

孫屯田召爲御史

薦牘交車府恩書下建章
輕軒辭瑞翟危弁學神
羊祖酌方滋桂行威欲犯霜
鳳毛仍襲慶雞舌更
含香氣鬱翔龍闕風清振
鷺行今朝洛民思東陌
盛壺漿

與諸友普明院亭納涼分題

岸幘清涼地脩然樂未窮
竹陰過晚雨林表見殘
虹花影平波上經聲小
塢東還思醉吟者寧與此
時同

梅花

似畏群芳妬先春發故林
曾無鶯蝶戀空被雪霜
侵不道東風遠應悲上苑
深南枝已零落羞笛寄
餘音

依韻和希深立春後祀風伯雨師畢過午橋莊
青郊誰駐馬謝客思池塘
野水微波綠江梅嫩蘂
黃初從莫風雨遂此樂
壺觴已愛幽禽語園林即
日芳

尹子漸歸華產茯苓若人形者賦以贈行
因歸話茯苓久著桐君籍成形得人物具體存標

格神岳畜粹和寒松化膏液外凝石稜紫內蘊瓊
腴白千載忽旦暮一朝成琥珀旣瑩毫芒分不與
蚊蚋隔拾芥曾未難爲器期增飾至珍行處稀美
價定多益

初見杏花

不待春風徧煙林獨早開淺紅欺醉粉肯信有江
梅

宛陵先生文集卷第一

宛陵先生文集目錄卷第二

西京詩

和載陽登廣福寺閣 和歐永叔同遊近郊

和永叔同遊上林院 和王幾道涂次杏花

遊園晚歸馬上 留題希深美檜亭

留守相公雉堞樓 和希深避暑香山寺

和希深晚泛伊川 路中月夕

張侍郎中隱堂 太尉相公伏日宴

送臧尉 新秋普明小飲詩序

得高樹早涼歸 新秋雨夜西齋文會

秋陰

雨中移竹

希深所居

和永叔柘枝謔

和載陽郊外

和永叔得山桂

河陽秋夕

希深惠書

送河清賈主簿

和永叔雪後見寄

和永叔黃河

季父知并州

河陰中寨寒食

再至洛中寒食

同永叔遊嵩山十二題

擬玉臺體七首

無題

宛陵先生文集卷第二

依韻和載陽登廣福寺閣

過聞聯騎出登覽思踰清曉漲林煙重春歸野水
平始看仙杏發已愛袂衣輕誰見吟餘處殘陽上
古城

依韻和歐陽永叔同遊近郊

洛水橋邊春已迴柳條葱蒨眼初開無人拾翠過
幽渚有客尋芳上古臺林邃珍禽時一嘯酒酣紅
日未西頽知君最是憐風物更約偷閑取次來
依韻和永叔同遊上林院後亭見櫻桃花

悉已披謝

去年君到見春遲今日尋芳是夙期
祇道朱櫻纔弄藥及來幽圃已殘枝
飄英尚有遊蜂戀著子唯應谷鳥知
把酒聊能慰餘景乘歡不厭夕陽時

依韻和王幾道涂次杏花有感

馬上逢丹杏芳條拂眼過
可憐荒徑少不道故園多
艷萼粘紅蠟仙葩縹薄羅
客心知易感路遠柰愁何

遊園晚歸馬上希深命賦

興盡夕陽天言歸躍杏鞦韆
新陰六街樹遠目萬家

煙歌咽樓千尺吟餘月一弦
花間有遊妓醉去墮金鈿

留題希深美檜亭

幽深有佳趣曾不減林泉
衆綠經新雨殘紅墮夕煙
栽萱北堂近夢草故池連
乘月時來往清歌思浩然

留守相公新剏雙桂樓

藻棟起霄間芳條俯可攀
晚雲談次改高鳥坐中還
日映城邊樹虹明雨外山
唯應謝池月來照來水閑

和希深避暑香山寺

有客乘新霽雲林共扣肩輕舟過下渡遠水漲前
汀原隰含幽藹岑嵐入杳冥誰知得深趣履齒石
苔青

和希深晚泛伊川

放溜下平波舟移不知遠稍迴溪口風恣愛雲中
嚙水鳥靜相依蘆洲藹將晚歸路莫言賒何妨乘
月返

路中月夕登霽景臺與唐英話別

風枝不動月光午況是高臺過新雨吳客方思千

里歸不負洛陽塵與土到時水落鱖鱸肥香稻初
炊鱠紅縷休言羊酪敵尊羹我亦長吟念東楚平
胡馬嘶誰可留去去相望富春渚

張侍郎中隱堂

疇昔人歸老於茲望白雲門高知後慶賓至誦先
芬草樹中園秀衣冠舊里聞寧同江令宅寂寞向
淮濱

太尉相公中伏日池亭宴會

得山字

何言避徂暑清宴水軒開竹氣陰池鳳雲峯照翠
山玳簪方映座綵服亦承顏樂奏寒波上杯香綠

芟間瓜浮五色爛簾捲半鈎彎今日賓裾盛素劉
豈足攀

送臧尉

藹藹神仙尉西風躍馬歸離群賦黃鵠拜慶着班
衣雨氣連關黑槐花上路飛同爲洛陽客今日故
人稀

新秋普明院竹林小飲詩序

余將北歸河陽友人歐陽永叔與二三君具觴豆
選勝絕欲極一日之歡以爲別於是得普明精廬醜
酒竹林間少長環席去獻酬之禮而上不失容下

不及亂和然嘯歌趣逸天外酒旣酣永叔曰今日
之樂無愧於古昔乘美景遠塵俗開口道心宵間
達則達矣於文則未也命取紙寫普賢佳句置坐
上各探一句字字爲韻以誌茲會之美咸曰永叔
言是不爾後人將以我輩爲酒肉狂人乎頃刻衆
詩皆就乃索大白盡醉而去明日第其篇請余爲
叙云

得高樹早涼歸

翻然思何苦昨夜秋風高良友念將別幅巾邀此
遨清梵隔寒流亂蟬鳴古樹誰知林下游復得盃

中趣池上暑風收竹間秋氣早回塘莫苦留已變
王孫草未墜高梧葉初生玉井涼愁心異潘岳獨
自向河陽不減阮家會所嗟當北歸耿耿敢辭醉
明發此歡非

新秋雨夜西齋文會

夜色際陰霾燈青謝客齋梧桐生靜思絡緯動秋
懷小酌寧辭醉清言不厭諧誰憐何水部吟苦怨
空塔

秋陰

已過蕭蕭雨猶成黯黯陰登臨潘岳思懷慄楚臣

心遠吹鳴高樹低雲冒晚岑久爲關外客不忍聽
踈砧

雨中移竹

荷鍾冒秋霖忽忽移翠竹欲分溪上陰聊助池邊
綠中散林未開子猷心已足青青謝栽培豈愧凡
草木

希深所居官舍新得府相蔬圃以廣西園
楚相拔葵後蕭條三畝餘煙畦偶連畛蕙圃得增
墟便欲開春沼何妨薙野蔬始添臺榭美況近子
雲居

和永叔柘枝詞

留守相公南莊按舞

漁陽三疊音隆隆紅蕖亂坼當秋風披香擁霧出
妖嫋嫋眉壯髮翩驚鴻鏘鏘雜珮離芳渚珠帽紅
靴振金縷相迎垂手勢如傾障袂倚詞欲吐最
憐應節乍低昂便轉疾徐皆可觀飄揚初認雪迴
風躑躅還看鬘縈緒小小寧聞怨曲長盈盈自解
依儔侶藝竒體妙按者誰金貂大尹宴清池綺茵
繡幄粲輝映玳簪珠履何委蛇是時郊原新退暑
天清氣爽過林野淮王載酒昔嘗聞謝公携妓那
能數始知事簡樂民和不厭來觀柘枝舞

依韻和載陽郊外

近隰葱龍曙驚鳥睥睨啼日光林杪動吹騎管中
嘶路遶寒原古煙橫遠戍迷今來異賓孟誰復歎
雄雞

奉和永叔得辛判官伊陽所寄山桂數本
封殖之後遂成雅韻以見貺

團團綠桂叢本自幽巖得惠好知不忘青葱寧改
色香生蓮幕間花白萱堂側月露夜偏滋瓊枝相

翕赫

河陽秋夕夢與永叔遊嵩避雨於峻極院

賦詩及覺猶能憶記俄而僕夫自洛來云
求叔諸君陪希深祠岳因足成短韻

夕寢北窓下青山夢與尋相歡不異昔勝事却疑
今風雨幽林靜雲煙古寺深此二句攬衣方有感
還喜問來音

希深惠書言與師魯永叔子聰幾道遊嵩

因誦而韻之

聞君奉宸詔瑞祝疑靈岫山水聊得游志願庶可
就豈無朋從俱況此一二秀方靳建春陌十刻殘
晝漏初經緱氏嶺古栢尚鬱茂却過輾轅關巨石

相撐鬪夕齋禮神祠法袞被藻繡畢事登山椒常
服更短後從者十數人輕齋不爲陋是時天清陰
力氣勇奔驟雲巖杳虧蔽花草藏澗竇傍林有珍
禽驚聒若避殼盤石暫憇休泓泉助吞漱上窺玉
女窓漸絕非可構下玩搗衣碓焜燿金紋透尹子
體雄恠攀緣逾習狃歐陽稱壯齡疲軟屢顛踣競
歡相扶持芒屨資踐蹠八仙存故壇三醉孰云謬
鄙哉封祝碑數子昔鑄鏤偶誌一時事曷虞來者
詬絕頂瞰諸峯隘然輕宇宙遙思謝塵煩欲知群
鳥獸韓公傳石室聞之固已舊當時興稍衰不暇

苦尋究東崖暗壑中釋子持經呪于今二十年飲
食同猿狖君子聆法音充爾溢膚腠嘗期躡屐過
吾儕色先愀韻叶遂乖真諦言茲亦甘自咎中頂會
幾望涼蟾皓如晝紛紛坐談謔草草具觴豆清露
濕中裳誰人苦羸瘦便即忘形骸胡為戀纓綬或
疑桂宮近斯語豈狂瞽歸來遊少室峭崿殊引脰
石室迢迢過探訪仍邂逅捫蘿上岑邃仙屋何廣
袤乳水出其間汨消自成溜凡骨此熏蒸靈真安
可覲霞壁幾千尋四字侷篆籀咸意苔辭文誠爲
造化授標之神清洞民俗未嘗邁忽覺風雨冥無
能久瞻扣忽忽遂宵征勝事皆可復俚歌縱喧譁
怪說多駭糅凌晨關塞陽追賞顏匪厚窮極四百
里寧憚疲左右昨朝書報予聞甚醉醇耐所嗟遊
遠方心焉倍如疚

送河清賈主簿歸任

不遠水雲間悠悠汨鷁還分亭接雞犬舉酒對河
山殘雪依荒磧寒煙入暝灣昔人鸞枳歎一併在
離顏

依韻和永叔雪後見寄兼云自尹家兄弟
及幾道散後子聰下縣久不得歸頗有離

索之歎

常欲登芒嶺無由見洛橋雪飛關戍迫人憶剡溪
遙廣隰嘶征鴈長河起怒飈遽言歡友散能使去
魂銷晚日窮幽藹愁雲暝沉寥縱令佳約在載酒
定何邀

依韻和歐陽永叔黃河八韻

少本江南客今爲河曲遊歲時憂淒溢日夕見奔
流齧岸侵民壤飄槎閣鴈洲峻門波作箭古郡鐵
爲牛目極高飛鳥身輕不及舟寒冰狐自聽源水
使嘗求密樹隨灣轉長留刮浪收如何貴沉玉川

興是諸侯

季父知并州

捧詔出明光飛軒陟太行玉墀分近侍虎綬給新
章笳吹喧行陌旌旗卷夜霜鴈歸汾水綠城墜代
雲黃土屋春風峭羶裘牧騎狂關山寧久駐刺宴
柳溪傍

河陰中寨寒食

擊柝聲初絕爲魚夢已殘幽禽哢清曉宿雨度餘
寒爨火明千竈風旗展一竿歸心慙社鷺自歎此
微官

再至洛中寒食

西洛逢寒食依依似昔年
千門方禁火九野自生煙
飄泊梨花雨追隨杏葉鞦
遊人莫惜醉風景滿伊川

同永叔子聰遊嵩山賦十二題

公路澗

我來袁公溪斷岸猶殘壘
僵柳遠臨灣新蒲初出水
行行古臺近兩兩驚禽起
雞犬何處聞人家深塢裏

拜馬澗

王子昔凌霓國人茲拜馬
依稀日夜笙聲入寒泉
瀉空傳七日期飛鶴何時下

二室道

度嶺失羣山千峯出天際
方欣左右看屢改縈迴勢
勝事誰與同芬然有蘭蕙

自峻極中院步登太室中峯

稅駕綠巖前攀蘿不知倦
人從樹杪來路向雲端轉
忽覺在煙霓回看峯嶺變

玉女窻

玉洞倚霞壁天窻露微明
驂鸞去不返啼鳥空相

驚萬木自虧蔽捫蘿復誰情

玉女擣衣石

幽石稱擣衣擣衣人不見雲纓白飄飄巖樹長葱
蒨猶應寒夜中山月來鋪練

天門

古壁何蒼蒼穿雲玉梯出歛然起青冥却立觀少
室前崑復後峯陰晴狀非一

天門泉

泠泠雲外泉的的巖光入靜若仙鑑開寒疑玉龍
蟄時應下鹿羣跡印青苔濕

天池

安知最高頂清淺水池開有時片雲出倏忽生風
雷誰羨雙黃鵠刷羽來徘徊

三醉石

相期物外遊共醉仙壇石舉手薄高空清風生兩
腋都忘塵世煩笑傲聊爲適

登太室中峯

日夕望蒼崖漸漸在天外及來步其巔下見河如
帶半壁雲霧昏山根已霽霈

峻極寺

山高路已窮
條爾逢蘭若
落日老僧閑
支頤古松下
緩步入禪庭
苔蒼但蕭洒

擬玉臺體七首

欲眠

鴛鴦羅薦開
翡翠香幃寂
解帶竟羞明
移燈向東壁

携手曲

携手出中閨
殷勤尅密期
密期雖不遠
迴顧步遲遲

雨中歸

來時雲冉冉
去值雨霏霏
莫怪羅衣濕
荆王夢罷歸

別後

昨日日暮別
今日日暮愁
猶認縱裙色
依依在石榴

夜夜曲

情來不自理
明月生南樓
坐感昔時樂
翻成此夜愁

落日窻中坐

含情獨不語
落日窻中時
妾意與君意
相思只自

知

領邊繡

出門重新製織手行自整願作花工兒長年承素頸

無題

斗覺瓊枝瘦慵開寶鑑粧臨風恐仙去倚扇怯歌長綠桂薰輕服靈符佩縹囊西隣空自賦不解到君傍

宛陵先生文集卷第二

宛陵先生文集目錄卷第三

西京詩

和希深新秋

客鄭遇曇穎

馬判官歸闕

餞彭城公赴隨州

早行道中相逢

古意

送弟歸宣城

河南張應之東齋

河南王尉西齋

劉秀才歸河內

憶洛中舊居

武陵行

西宮怨

夏夜小庭有懷

外兄施伯侃下第

鄭戡及第東歸

施判官赴饒州

楊旼赴官并州

歐陽寺丞桐城宰

祝熙載赴任東陽

彦國通判絳州

餘姚陳寺丞

明州鄭推官

聚蚊

賦秋鴻送劉衡州

清池

弟歸觀并州

張脩赴威勝軍判官

弔唐俞

任適尉烏程

馬殿丞通判密州

夏侯彥濟武陟主簿

効昌黎體

月夜與兄納涼

隨州錢相公挽詩

僧可真東歸

廖秀才歸衡山縣

魏屯田知楚州

張子野赴鄭州

擬王維偶然作

蘇祠部通判洪州

中秋與希深別

望芒碭山

初見淮山

旌義港阻風

和劉六淮潮

舟中聞蛩

雙野鳥

和才叔岸傍古廟

山光寺

自急流口入金陵

早渡長蘆江

采石懷古

望夫山

泊牛渚磯

遊響山

蕪湖口留別弟

金霞閣

送蟾上人遊南嶽

王公懜東歸

幾道隰州判官

目錄終

宛陵先生文集卷第三

依韻和希深新秋會東堂

何必水周堂
翛然萬木涼
朋簪茲共樂
節物自迎商
巧笑承歡劇
新詞度曲長
駮鸞悲霧扇
泛蟻醕雲漿
並帶榴房熟
連叢桂葉香
人初投轄
醉客甚搵櫂
狂鬢約寒鷗
碧衣輕舞蝶
黃流波閑任注
錯席豈依行
疊疊談寧倦
厭厭夜未央
良時誠可惜
清燕此無荒

客鄭遇曇穎自洛中東歸

禪衣本壞色
不化洛陽塵
獨有煙霞染
况將山

水親西風入關戍宿雨過城闌誰羨飄然跡吾
車亦已巾

馬判官歸闕

與君歸洛陽仕宦頗相偶荏苒遷歲時徘徊樂
文酒今歸已及瓜爲贈聊折柳亦將隨計書慘
別寧嗟久

餞彭城公赴隨州龍門道上作

零雨送車輪初清遠陌塵歸藩漢東國遮道洛
陽人伊水照虹旆楚山懷玉麟征軒不可戀梗
淚返城闌

早行道中相逢

黯黯雨雲晦駸駸車馬繁唯憂不及見及見返
無言

古意

故人留雅曲今與新人彈新人聽不足復使後
人歡

送弟良臣歸宣城

喬木句溪邊秋光幾曲連將歸三畝宅遠寄下
江舡伴爾唯征鴈悲余有暮蟬親朋如見問貧
外似當年

河南張應之東齋

昔我居此時鑿池通竹圃池清少游魚林淺無
棲羽至今寒慙風靜送枯荷雨雨歇吏人稀知
君獨吟苦

河南王尉西齋

官舍古城隅西齋何窸窣種竹幽趣深開屏翠
光滴青山露南墻落日明東壁危臺起其傍平
隰坐可覲歲暮野田空天高霜隼擊更憐風月
時幾弄林間笛

劉秀才歸河內

君家太行下應復近蘇門河氣知寒早嵐煙覺
暮昏犬鳴林外火笛響月中村久作山陽客逢
人爲寄言

憶洛中舊居寄永叔兼簡師魯彥國

東堂石榴下夜飲曉未還絺衣濕浩露桂酒生
朱顏君同尹與富高論曾莫攀開吐仁義奧傲
睨天地間以此爲朋樂衡門未嘗關自從北闕
來擾擾時少閑登危欲引望尚不見雲山何由
覲夫子客袂淚瀾斑

武陵行

生事在漁樵所居亦煙水野艇一竿絲朝朝狎
清泚忽自傍藤陰乘流轉山崑始覺景氣佳潛
通小溪裏常時不見春入谷驚紅菜幽興窮綠
波翫芳心莫已花外一峯明林間碧洞啓遙聞
雞犬音漸悟人煙邇捨舟遂潛行石徑劣容屣
豁然有田園竹果相叢倚危眉鬢髻人倏遇心
顏喜尚作秦衣裳那知漢名氏自言逢世亂避
地因居比來時手種桃今日開如綺更看水上
花幾度逐風委覓引飯彫胡邀歡酌瓊醴復呼
童稚前綠鬢仍皓齒翻遣念還茅思歸釣鱸魚
將辭亦贈言勿道立壑羨鼓柁出仙源繁英猶
遷迤薄暮返蒼洲微風吹白芷他日欲重過茫
茫何處是

西宮怨

漢宮中選時天下誰爲校寵至莫言非恩移難
恃貌一朝居別館悔妬何由效買賦豈無金其
如君不樂

夏夜小亭有懷

西南雨氣濃林上昏月色寒影不隨人寥寥空
露白

外兄施伯侃下第赴并門叔父招
共是干時者同爲失意人言趨太原召如慰宛
陵親笳鼓聽臨塞琴書未離身別君無斗酒當
識士安貧

鄭戩及第東歸後赴洋州幕

郤生方得桂王粲始從戎一舸辭吳會單車入
漢中亂山雲木古側徑野泉通欲識風煙美心
知故國同

施判官赴饒州

昔日里中舊今爲幙下英煙波歸楚國風月滿

都城食有江魚美時無羽檄驚他年儻行縣肯
使折腰迎

楊旼赴官并州

嘗聞地近胡寒氣盛中都車馬行臨塞關山見
落榆吳鉤皆尚壯章甫幾爲儒寄謝西曹掾能
吟秀句無

歐陽寺丞桐城宰

葉落淮南樹青山徧馬頭人煙將近郭松竹不
知秋夜虎林間嘯溪泉舍下流門前仲卿廟遺
跡待君求

朱邑冢
祠在焉

祝熙載赴任東陽 李都尉客

東陽羨山水之子本風流稍去何平叔還追沈
隱侯清江飛晚雨斜日半滄洲縣道行無愧煙
蘿有勝遊

彥國通判絳州

結友時未久情親心已照氛埃外自遣風月還
同調復與任浮沉未嘗趨近要以此雖處貧寧
防俗者誚今將辭我去盡日來談笑窮巷敞茅
茨高言出廊廟且作朱轂行聊能發光耀當亦
就銅墨遠之江海徼山郭寂無喧雲川不妨釣

所嗟胡越人千里煩登眺

餘姚陳寺丞

試邑來勾越風煙復上游江潮自迎客山月亦隨
舟海貨通閭市漁歌入縣樓絃琴無外事坐見浦
帆收

明州推官鄭先輩

應幙海邊郡秋風千里歸隨潮吳榜駛轉浦楚山
微野橘霜前熟江螿露下肥還家候靈鵲人想罷
鳴機

聚蚊

日落月復昏飛蚊稍離隙聚空雷殷殷舞庭煙幕
羃蛛網徒爾施塘芥詎能磔猛蝎亦助惡腹毒將
肆螫不能有兩翅索索緣暗壁貴人居大第蛟綃
圍枕席嗟爾於其中寧夸紫如戟忍哉傍窮困曾
未哀癯瘠利吻竟相侵飲血自求益蝙蝠空翱翔
何嘗爲屏獲鳴蟬飽風露亦不慙喙息薨薨勿以
恃會有東方白

賦秋鴻送劉衡州

沆

秋鴻整羽翮去就自因時往春南方來遂止天泉
池天泉水清泚鴛鴦日追隨蒲藻豈不樂江湖信

所宜今朝風色便暫向衡陽歸洞庭逢葉下瀟湘
先客飛渚有蘭杜美心無稻糧早曾繳勿爾念鷹
隼寧爾窺煙波千萬里足以資盤嬉峯前想回日
青冥生路岐

清池

泠泠清水池藻荇何參差美人留采掇玉鮪自揚
鬢波瀾日已淺龜鼈日復滋蝦蟇縱跳梁得以緣
其涯竟此長科斗凌亂滿澄漪空有文字質非無
簡策施仙鯉勿苦羨寧將麤蛤卑徒剖腹中書悠
悠誰爾知聊保性命理遠潛江海湄泚泚曷足道

任彼蛙黽爲

弟得臣歸覲并州

知君歸去心已逐秋風起明發登太行遙將望汾
水藹藹白雲下吾親正居此拜慶曷爲榮新除
官美

張脩赴威勝軍判官

青驪渡河水俠氣動刀環入幕沙塵暗臨風鼓角
閑地形通栢谷秋色滿榆關誰復輕儒者難淹筆
硯間

弔唐俞

通閨年最少才俊罕能雙鵬去塵栖室竟歸霧起
窻慈親留漢水愛妾返荆江一稚絕能語瑩然寄
遠邦

任適尉烏程

俛作程鄉尉折腰還自甘卞峯晴照黛雲水曉澄
藍葑上春田闢蘆中走吏參到時蘋葉長柳暉蓋
江南

馬殿丞通判密州

晨裝辭北闕懷紱貳東侯地本全齊勝風仍變魯
優危帆淮上去古木海邊秋相送江潭客曾同十

載遊

夏侯彥濟武陟主簿

懷縣曾余往風謠爲爾知寒先太行近潤接大河
卑賓酒材公林晨羹翦露葵簿書行正委何似布
衣時

余居御橋南夜聞祆鳥鳴効昌黎體

都城夜半陰雲黑忽聞轉轂聲咿啾嘗憶楚鄉有
祆鳥一身九首如贅疣或時月暗過閭里緩音低
語若有求小兒藏頭婦滅火閉門雞犬不爾留我
門楚俗何苦爾云是鬼車載鬼遊鬼車載鬼奚所

及抽人之筋繫車軸昔聽此言未能信欲訪上天
終無由今來中土百物正安得遂與南方儔上帝
因風如可達願令驅逐出九州

月夜與兄公度納涼閑行至御橋

夕月吐澄明陰雲淨如掃空庭引天翠爽氣生懷
抱家近御橋頭因爲橋畔遊倚欄波上影不共水
東流思歸此清夜何處是江樓四望遠寂歷微風
動颼颼觀闕垂萬象山河趨九州壯哉帝王宅顧
我一蜉蝣富貴非可取田園今向秋明當拂衣去
試與問扁舟

隨州錢相公挽詩

築巖無往夢遊岱有飛魂墮淚隋侯國遺金漢帝
恩文章流日域忠孝在王門天道何由問秋風徧
九原

昔日傷歸國今朝歎舉輜憂愁傳楚此殄悴感周
詩文草明時訪忠言故吏知居常嗚咽涕翻作衆
人悲

去年伊水上傾府望雲岑路轉猶迴首人誰不殞
心可憐飛語後擠恨九幽深從此埋英骨空令淚
滿襟

僧可真東歸因謁范蘇州

仲淹

姑蘇臺畔去雲壑付清機野策過寒水山童護衲
衣松門正投宿竹笠帶餘暉誰愛杼山句使君應
姓韋

廖秀才歸衡山縣

千里倦爲客秋歸鳥榜輕過林湘橘暗收潦楚江
清晚泊親鷗鷺殘芳襲杜蘅長沙幾日到天際見
高城

魏屯田知楚州

淮南木葉敬馬淮上使君行天外高帆出沙頭候吏

迎夜潮通廢埭秋月滿孤城正遲文翁化從來楚俗輕

張子野赴官鄭州

盡室寄東里一官辭上都只應乘小馬寧肯躡雙鳧秋雨生陂水高風落廟梧梅山爲余訪還有舊家無

擬王維偶然作

嵇康任天性傲散喜端居自云安卑者竊比老莊歟一月十五日頭面忘洗梳危坐恣搔虱於時懶作書一曲情自寄一盃歡有餘尚子志所慕阮生

甘不如黃精可養壽廣澤宜觀魚不堪行作吏章服畏猿狙

蘇祠部通判洪州

飛鷁去江西秋飈滿桂旗蘆洲花白處楓岸葉丹時沙鳥看來沒雲山愛後移高才屬滕閣家擅子卿詩

中秋與希深別後月下寄

薄霧生寒水寥寥艤畫舫人傷千里別桂吐十分圓把酒非前夕追懽憶去年南樓足佳興好在謝林川

望芒碭山

出舟跳古岸林外見脩岡
回頭問榜子前嶽是芒碭
其顛有高廟松栢鬱蒼蒼
迤邐堆阜屬蕭條苑葉黃
千古收王氣一川平
夕陽人家繞四五雞犬
自相望尚爾想新豐
誰復思沛鄉臨流一舉酒可
以喻悲傷

初見淮山

遊宦久去國扁舟今始還
朝來汴口望喜見淮上山
斷嶺碧峯出平沙白鳥閑
南歸不厭遠况在水雲間

旌義港阻風

清晨下長淮忽值秋風惡
渺瀰雲霧昏掀合魚龍作
方驚白浪高又以寒潮落
遠渚時出沒輕舟自前却
將投古戍迷偶得孤港泊
下纜寄蘆林尋村步芒屨
儻有白醪沽聊爲野田酌
茆屋何颼颼瓦罌空索索
却持杖頭歸相顧還寂寞
一夕不能眠孤吟當狂藥

依韻和劉六淮潮

汐潮如有信時向舊痕生
始覺回波定還看曲渚
平舞鷗隨下上寒日共浮
傾後夜人無寐遙聽入

浦聲

舟中聞蛩

秋月滿行舟秋蟲響孤岸豈獨居者愁當令客心
亂展轉重興嗟所嗟時節換時節不苦留川涂行
已半霜落草根枯清音從此斷誰復過江南哀鴻
爲我伴

雙野鳥

野水雙紋翼雲羅謾自媒驚飛帶波起行唳拂萍
開暖日浮還沒寒汀去復來王喬如可挹仙舄此
徘徊

和才叔岸傍古廟

樹老垂纓亂祠荒向水開偶人經雨踣古屋爲風
摧野鳥棲塵坐漁郎奠竹杯欲傳山鬼曲無柰楚
辭哀

山光寺

煬帝故宮

古橋經廢寺蒼蘚舊離宮栢殿秋陰冷蓮堂暮色
空鳥啼山靄裏僧語竹林中寂寞蕪城近蕭蕭牧
笛風

自急流口至長蘆江入金陵

始發碧江口曠然諧遠心風清舟在鑑日落水浮

金瓜步逢潮信臺城過鴈音故鄉何處是雲外即
喬林

早渡長蘆江

帶月出寒浦殘星浸水濱帆開風色正舟急浪花
分霧氣橫江白雞聲隔岸聞天晴建業近鍾岫起
孤雲

采石懷古

青峯來合沓勢壓大江雄舟渡神兵後城荒王氣
空山根魚浪白巖壁石蘿紅弄月人何在孤墳細
草中

望夫山

亭亭千古曾曾是念征夫一作山頭石畏看天際
途猶如託蘿蔓不似采蘼蕪時有江雲近仙衣挂
六銖

泊牛渚磯

所謂鼓吹山也
有竹可作笙竽

落帆牛渚前便爲牛渚宿波搖殘照中采翠浮巖
谷巖谷足幽篁石上羅寒玉裁作媧氏笙堪吹鳳
凰曲楚客夕無眠獨將清籟續更看江月來還想
燃犀燭

遊響山

久憶門前勝聊乘逸興遊寒篙進溪曲古木暗城頭
鳥過空潭響舩隨碧瀨流梅花三疊罷煙火起
滄洲

蕪湖口留別弟信臣

少也遠辭親俱爲異鄉客昨日偶同歸今朝復南
適南適畏簡書叨茲六百石重念我當去送我江
之側溪山遠更清溪水深轉碧因知惜別情愈賒
應愈劇

金霞閣

登臨無盡興清燕日徘徊霞影綠觚落嵐光入牖

來離宮分碧瓦太液俯青槐好待邀明月瑤琴爲
一開

送蟾上人遊南嶽

葉下瀟湘闊盃浮豈道遲賓鴻不到處危約獨行
時翠嶺祝融宅喬松虞舜祠雲霞遊徧日振錫更
何之

王公慥東歸

行色上東陌秋槐葉亂飛囊無一錢用篋有古書
歸羸馬嘶寒草荒城背落暉莫嫌牛馬隔走別八
行稀

幾道隰州判官

清曉赴國門西風生早涼天地大道出苑樹短亭
傍相看車馬色共照池水光舉酒酒非淺明朝誰
重觴話別語難盡去後空回腸計彼行路遠幾日
至洛陽洛陽多舊友一一道相望失意非憔悴懷
昔無悲傷無由戀中國不久之南方音書儻能問
鴻鴈亦將翔此外念出處便爲參與商到官秋節
晚塞近百草黃定隨劉武威校獵赤土崗余方楓
林下野艇泛滄浪弄月江波闊冒衣菱苕香雖知
各所適未免涕霑裳搵袂却引顧煙蕪平夕陽獨

回唯鳥影相與過林塘朋游頓茲減客心仍未央

宛陵先生文集卷第三

